

Broj: 03-33-413/2021
Sarajevo, 12.01.2022. godine

Bosna i Hercegovina
Federacija Bosne i Hercegovine
PARLAMENT FEDERACIJE
SARAJEVO

Primijeno: 13-01-2022			
Org. jed.	Broj	Priloga	Vrijednost
01,02	-33-	253	121

**PARLAMENT FEDERACIJE
BOSNE I HERCEGOVINE**

- **Predstavnički dom-
gosp. Mirsad Zaimović, predsjedavajući**
- **Dom naroda –
gosp. Tomislav Martinović, predsjedavajući**

Poštovani,

U prilogu Vam dostavljam **INFORMACIJU O EPIDEMIOLOŠKOJ SITUACIJI COVID-19 U FEDERACIJI BOSNE I HERCEGOVINE NA DAN 10.01.2022. GODINE, S PRIJEDLOGOM NAREDBI I PREPORUKA KRIZNOG ŠTABA FEDERALNOG MINISTARSTVA ZDRAVSTVA**, koju je Vlada Federacije Bosne i Hercegovine usvojila na 298. sjednici, održanoj 12.01.2022. godine, Zaključkom V. broj: 7/2022 od 12.01.2022. godine.

S poštovanjem,



Prilog: kao u tekstu

GOVERNMENT

Na osnovu člana 19. stav (4) Zakona o Vladi Federacije Bosne i Hercegovine ("Službene novine Federacije BiH", br. 1/94, 8/95, 58/02, 19/03, 2/06 i 8/06), na prijedlog Kriznog štaba Federalnog ministarstva zdravstva, a u cilju realizacije Zaključka Vlade Federacije Bosne i Hercegovine V. Broj: 21/2021 od 08.01.2021. godine donijetog s ciljem implementacije Odluke o dopustivosti i meritumu Ustavnog suda Bosne i Hercegovine u predmetu E.Š. i dr. broj: AP-3683/20, Vlada Federacije Bosne i Hercegovine na 298. sjednici, održanoj 12.01.2022. godine, donosi

ZAKLJUČKE

o usvajanju Informacije o epidemiološkoj situaciji COVID-19 u Federaciji Bosne i Hercegovine na dan 10.01.2022. godine s prijedlogom naredbi i preporuka Kriznog štaba Federalnog ministarstva zdravstva

1. Usvaja se Informacija o epidemiološkoj situaciji COVID-19 u Federaciji Bosne i Hercegovine na dan 10.01.2022. godine s prijedlogom naredbi i preporuka Kriznog štaba Federalnog ministarstva zdravstva.
2. Usvajaju se Naredbe Kriznog štaba Federalnog ministarstva zdravstva koje su sastavni dio ovih zaključaka (Prilog 1).
3. Usvajaju se Preporuke Kriznog štaba Federalnog ministarstva zdravstva koje su sastavni dio ovih zaključaka (Prilog 2).
4. Naređuje se vladama kantona, odnosno kriznim štabovima kantonalnih ministarstava zdravstva uvođenje restriktivnijih mjera spram procjene epidemiološke situacije u kantonu, odnosno općini, uz redovno izvještavanje Kriznog štaba Federalnog ministarstva zdravstva.
5. Preporučuje se vladama kantona, da saglasno epidemiološkoj situaciji COVID-19 na području kantona, procjeni rizika, kao i dokumenta „Javnozdravstveni kriteriji za prilagodbu javnozdravstvenih i društvenih mjera u kontekstu COVID-19“ uvedu Pravilo vakcinisan/a, prebolio/ljela, testiran/a (VPT) za područje kantona i o istom obavijeste Krizni štab Federalnog ministarstva zdravstva.
6. U skladu sa zaključkom pod tačkom 5., zadužuje se Krizni štab Federalnog ministarstva zdravstva da prati epidemiološku situaciju COVID-19 na području Federacije Bosne i Hercegovine, kao i uvođenje i implementiranje Pravila vakcinisan/a, prebolio/ljela, testiran/a (VPT) za područje kantona, te ukoliko ocijeni potrebu predlaganja jedinstvenih mjera na području Federacije Bosne i Hercegovine u vezi Pravila VPT o tome obavijesti Vladu Federacije Bosne i Hercegovine radi donošenja mjere.

7. Naredbe i Preporuke Kriznog štaba Federalnog ministarstva zdravstva donose se s rokom važenja od 14 dana računajući od dana, 13.01.2022. godine, koji se utvrđuje kao dan početka primjene ovih naredbi i preporuka.
8. Prije isteka roka iz tačke 7. ovih zaključaka, zadužuje se Krizni štab Federalnog ministarstva zdravstva da sagleda kompletnu epidemiološku situaciju COVID-19 u Federaciji BiH i sačini procjenu rizika, a radi razmatranja mogućnosti i potrebe izmjene naredbi i preporuka utvrđenih ovim zaključkom, te prema Vladi Federacije Bosne i Hercegovine dostavi prijedlog novih naredbi i preporuka.
9. Zadužuje se Krizni štab Federalnog ministarstva zdravstva da ove zaključke s priložima dostavi prema kriznim štabovima kantonalnih ministarstava zdravstva, kantonalnim ministarstvima zdravstva, zdravstvenim ustanovama s područja kantona putem kriznih štabova kantonalnih ministarstava zdravstva, kliničkim centrima u Federaciji BiH, općim, kantonalnim i specijalnim bolnicama putem kriznih štabova kantonalnih ministarstava zdravstva, Federalnoj i kantonalnim upravama za inspeksijske poslove i Upravama policija MUP-a kantona.
10. U skladu sa zaključkom V. broj 21/2021 od 08.01.2021. godine pod tačkom 4., Vlada Federacije Bosne i Hercegovine će obavijestiti Parlament Federacije Bosne i Hercegovine o epidemiološkoj situaciji u Federaciji Bosne i Hercegovine i mjerama Vlade Federacije Bosne i Hercegovine koje su donesene u cilju zaštite zdravlja građana i smanjenja rizika za širenje virusa, na 298. sjednici održanoj dana, 12.01.2022. godine.
11. Ovi zaključci stupaju na snagu danom donošenja i objavit će se u "Službenim novinama Federacije BiH".

V. broj: 7 /2022
12.01.2022. godine
Sarajevo



PREMIJER

Fadil Novalić
Fadil Novalić

Prilog 1.

NAREDBE KRIZNOG ŠTABA FEDERALNOG MINISTARSTVA ZDRAVSTVA

I. OPĆE NAREDBE

1. Naređuje se vladama kantona, odnosno kriznim štabovima kantonalnih ministarstava zdravstva donošenje restriktivnijih mjera u odnosu na mjere iz ove naredbe, u skladu s procjenom rizika događaja koji mogu dovesti do pogoršanja epidemiološke situacije, kao i na osnovu aktuelne epidemiološke situacije koja se temelji na sedmičnoj incidenci zaraženih, broju hospitaliziranih pacijenata, broju pacijenata koji koriste respiratornu podršku i raspoloživosti svih resursa u zdravstvu (tehničkih, ljudskih i dr.).
2. Naređuje se obavezno nošenje zaštitnih maski preko usta i nosa za zaštitu respiratornog sistema u zatvorenom prostoru i uz poštivanje razmaka od minimalno 2 metra.

Nalaže se obavezno nošenje maske i na otvorenom prostoru, ako se ne može ostvariti razmak od 2 metra. Obavezno je nošenje maski na stajalištima javnog prevoza, pijacama/otvorenim tržnicama i na drugim mjestima gdje se primijeti veća fluktuacija stanovništva.

Izuzetno, zaštitne maske nisu obavezni nositi:

- djeca mlađa od šest godina, osobe koje imaju probleme s disanjem zbog hroničnih bolesti ili koje ne mogu skinuti masku bez pomoći druge osobe, npr. osobe s intelektualnim poteškoćama ili smetnjama u razvoju, osobe s oštećenjem sluha;
- učenici osnovnih škola od 1. do 5. razreda tokom obavljanja nastave u učionicama;
- sportisti na utakmicama, treninzima i sportskim aktivnostima, vozači na biciklu, električnom romobilu i motociklu;
- članovi iste porodice koji na otvorenom prostoru ne ostvaruju razmak od 2 metra.

3. Dopušteno je okupljanje ljudi na određenom prostoru pod sljedećim uvjetima:

- ne više od 30 ljudi u zatvorenom prostoru;
- ne više od 100 ljudi na otvorenom prostoru.

Sva okupljanja unutar navedenih ograničenja moraju se odvijati u prostoru koji omogućuje obavezni fizički razmak od najmanje 2 metra između osoba (osim članova istog domaćinstva).

S ciljem smanjivanja rizika od COVID-19, kao i zaštite ličnog zdravlja, za vrijeme okupljanja potrebno je obavezno pridržavanje preporuka koje su donijeli zavodi za javno zdravstvo u Federaciji BiH (higijensko-epidemioloških mjera). Za provođenje mjera na

skupovima odgovorni su organizatori okupljanja. Organizator je prilikom održavanja skupa dužan postupati u skladu s propisima o javnom okupljanju.

4. Nalaže se kriznim štabovima kantonalnih ministarstava zdravstva da na osnovu procjene COVID-19 epidemiološke situacije na području kantona reduciraju broj osoba, od maksimalno dopuštenog broja osoba u otvorenom i zatvorenom prostoru u skladu s tačkom 3. ove naredbe, na skupovima koji se održavaju, poput: političkih skupova, vjenčanja, svadbi, krizmi, sprovoda, dženaza i drugih porodičnih okupljanja i sličnih događaja, a u cilju sprječavanja širenja infekcije COVID-19 među stanovništvom, kao i zaštite ličnog zdravlja i javnog zdravlja stanovništva.
5. Izuzetno od tačke 3. ove naredbe, dopušta se organiziranje i većih okupljanja u zatvorenom i na otvorenom, pod uvjetom da veličina prostora omogućava provedbu higijensko-epidemioloških mjera, ali ne više od:
 - 60 osoba u zatvorenom prostoru, odnosno
 - 200 osoba na otvorenom prostoru.

Uvjet je da svi učesnici skupa imaju:

- negativan antigenski test, ne stariji od 24 sata ili PCR test, ne stariji od 48 sati, ili
- potvrdu o prebolovanom COVID-19, ne stariju od 4 mjeseca, ili
- potvrdu o završenoj vakcinaciji (ne stariju od 6 mjeseci nakon druge doze vakcine, odnosno 9 mjeseci nakon treće doze vakcine).

Za provođenje epidemioloških mjera i organizaciju skupa odgovoran je organizator skupa.

Organizator skupa iz ove tačke dužan je prethodno dobiti saglasnost od nadležnog kriznog štaba kantonalnog ministarstva zdravstva koja se izdaje na osnovu mišljenja nadležnog zavoda za javno zdravstvo kantona, koje sadrži procjenu rizika.

6. Okupljanja koja nisu u skladu s uvjetima propisanim u tački 3., odnosno tački 5. nisu dozvoljena.
7. U uvjetima COVID-19 epidemiološke situacije u Federaciji BiH naređuje se striktno poštivanje preporuka Zavoda za javno zdravstvo Federacije Bosne i Hercegovine, za sve one na koje se preporuke odnose, a koje su dostupne na www.zzjzfbih.ba, i to:
 - preporuke za državljane BiH i strane državljane koji ulaze u BiH;
 - preporuke - javni prevoz;
 - preporuke za muzeje, galerije, kina i sl.;
 - preporuke za ugostiteljske objekte;
 - preporuke za škole u kontekstu COVID-19 za školsku 2021./2022. godinu;
 - preporuke - vrtići;
 - preporuke za stomatološke ordinacije;
 - preporuke - trajni smještaj i zbrinjavanje;
 - preporuke za sportsko-rekreativne aktivnosti – dopuna;

- preporuke za rad hotela;
 - preporuke za trgovine, uslužne djelatnosti, tržne centre;
 - preporuke – proslave;
 - preporuke za rad studentskih domova u kontekstu COVID-19;
 - preporuke za skijališta.
8. Naređuje se Federalnoj upravi za inspekcijske poslove i kantonalnim upravama za inspekcijske poslove, kao i inspekcijama organiziranim pri nadležnim ministarstvima u kantonu, odnosno nadležnim općinskim i gradskim inspektorima da kontinuirano kontroliraju provođenje Naredbe pod tač. 2., 3., 4., 5., 6. i 7. ovog poglavlja, te u skladu sa svojim ovlaštenjima poduzimaju mjere iz okvira svoje nadležnosti, koja uključuje pokretanje krivičnih prijava protiv počinitelja za koje se postavi osnovana sumnja da ne izvršavaju naredbe u uvjetima pandemije COVID-19 za krivična djela kažnjiva po Krivičnom zakonu Federacije BiH.
 9. Traži se od nadležnih uprava policije i nadležnih tužilaštava hitno postupanje po podnesenim krivičnim prijavama iz tačke 7. ove naredbe, u skladu s njihovim ovlaštenjima.

II. NAREDBE ZA KRIZNE ŠTABOVE KANTONALNIH MINISTARSTAVA ZDRAVSTVA I USTANOVE I DRUGE SUBJEKTE U OBLASTI ZDRAVSTVA

1. Obavezuju se krizni štabovi kantonalnih ministarstava zdravstva, kao i zdravstvenih ustanova s područja kantona, da redovno revidiraju krizne planove pripravnosti i odgovora na pojavu novog koronavirusa (COVID-19), prema promjeni epidemiološke situacije na području kantona ili lokalne zajednice.
2. Naređuje se vladama kantona, odnosno kriznim štabovima kantonalnih ministarstava zdravstva obavezno postupanje po dokumentu „Javnozdravstveni kriteriji za prilagođavanje javnozdravstvenih i društvenih mjera u kontekstu COVID-19“.
3. Nalaže se svim zdravstvenim ustanovama na području Federacije BiH da nastave s kontinuiranom provedbom i primjenom kantonalnog kriznog plana pripravnosti i odgovora na pojavu COVID-19, a posebno mjera koje se odnose na hospitalizaciju osoba i drugih mjera prema izvorima zaraze, u skladu s revidiranim dokumentom „Upravljanje slučajem COVID-19 i osiguranje kontinuiteta zdravstvenih službi – prenos u zajednici“.
4. Sve zdravstvene ustanove na području Federacije Bosne i Hercegovine dužne su organizirati pružanje zdravstvenih usluga za koje su registrirane, u skladu s raspoloživim resursima.
5. Nalaže se kriznim štabovima kantonalnih ministarstava zdravstva da budu spremni za slučaj zbrinjavanja većeg broja oboljelih u zdravstvenim ustanovama, u skladu s odredbama Zakona o zaštiti stanovništva od zaraznih bolesti („Službene novine Federacije BiH“, broj 29/05), a u skladu s epidemiološkom situacijom.

Nalaže se kantonalnim ministrima nadležnim za zdravstvo da poduzimaju mjere i aktivnosti u smislu angažiranja zdravstvenih radnika, organizacije i rasporeda rada i radnog vremena, promjene mjesta i uvjeta rada pojedinih zdravstvenih ustanova, u skladu s epidemiološkom situacijom.

6. Zadužuju se zavodi za javno zdravstvo kantona da pojačaju nadzor nad provedbom i primjenom kantonalnog kriznog plana pripravnosti i odgovora na pojavu novog koronavirusa (COVID-19).
7. U zdravstvenim ustanovama, bez obzira na oblik vlasništva, kao i privatnim praksama, obavezno je provođenje trijaže i pridržavanje striktnih mjera za prevenciju i kontrolu infekcije i praćenje općih i specifičnih preporuka radi sigurnosti osoblja i pacijenata u kontekstu COVID-19.
8. Nalaže se kliničkim centrima u Federaciji BiH, kao i općim, kantonalnim i specijalnim bolnicama u Federaciji BiH, da osiguraju 30% svojih kapaciteta za hospitalizaciju i liječenje pacijenata oboljelih od COVID-19. Za provedbu ove naredbe odgovorni su direktori i upravni odbori zdravstvenih ustanova, svako u okviru svojih zakonom utvrđenih nadležnosti.

U skladu s epidemiološkom situacijom COVID-19, svaka bolnica je dužna imati plan zadovoljenja povećanih potreba za COVID-19 kapacitetima. Plan mora biti jasan i precizan, koordiniran s kriznim štabom nadležnog ministarstva zdravstva, te sačinjen u skladu s revidiranim dokumentom „Upravljanje slučajem COVID-19 i osiguranje kontinuiteta zdravstvenih službi – prenos u zajednici“.

9. Nalaže se kriznim štabovima kantonalnih ministarstava zdravstva da u svim zdravstvenim ustanovama na području kantona, bez obzira na oblik vlasništva, kao i kliničkim centrima u Federaciji BiH, osiguraju u kontinuitetu rad bolničkih komisija i bolničkih timova s ciljem sprječavanja širenja COVID-19 infekcije u zdravstvenim ustanovama, u skladu s članom 51. Zakona o zaštiti stanovništva od zaraznih bolesti, kao i odredbama Pravilnika o uvjetima i načinu provođenja mjera za sprječavanje i suzbijanje bolničkih infekcija („Službene novine Federacije BiH“, broj 84/10).
10. Mikrobiološku djelatnost - laboratorijsku izolaciju virusne RNA i identifikaciju uzročnika zarazne bolesti (SARS-CoV-2) radi utvrđivanja dijagnoze na COVID-19 obavljaju laboratoriji zdravstvenih ustanova verificirani od strane Federalnog ministarstva zdravstva, kao i Veterinarski fakultet Univerziteta u Sarajevu – Laboratorij za molekularno-genetička i forenzička ispitivanja, kao podrška javnom sektoru zdravstva, i to za vrijeme trajanja potrebe za obavljanje ove djelatnosti u Federaciji BiH prema epidemiološkoj COVID-19 situaciji u BiH i u svijetu.

Svi verificirani laboratoriji, kao i Veterinarski fakultet Univerziteta u Sarajevu – Laboratorij za molekularno-genetička i forenzička ispitivanja, kao podrška javnom sektoru zdravstva iz stava (1) ove tačke, dužni su čuvati originalne uzorke i ekstrakcije, na temperaturi od minimalno -20 °C, najmanje 14 dana, računajući od dana testiranja, kao i voditi ažurne evidencije o korištenim internim i pozitivnim kontrolama u smislu utvrđenih vrijednosti istih.

11. U svrhu unapređenja odgovora na pandemiju COVID-19, kod pacijenata s izraženim kliničkim simptomima karakterističnim za ovo oboljenje (u skladu s definicijom slučaja), osim PCR temeljnih testova, koji ostaju zlatni standard za dijagnostiku, preporučuje se i korištenje antigenskih testova (Ag-RDT).

Antigenski testovi se mogu koristiti u situacijama kada je PCR nedostupan ili kada je potrebno duže vrijeme za obradu, ili kada je propisano ovom naredbom. Antigenski testovi za detekciju SARS-CoV-2 moraju ispunjavati minimalne zahtjeve: $\geq 90\%$ senzitivnost i $\geq 97\%$ specifičnost u poređenju s referentnim PCR testom.

Testiranje Ag-RDT testovima se treba provoditi prema uputstvima proizvođača i nakon pojave simptoma do petog (5) dana. Negativan rezultat antigenog testiranja ne može u potpunosti isključiti aktivnu COVID-19 infekciju, te je kod simptomatskih pacijenata potrebno ponovljeno testiranje PCR testom.

Testiranje Ag-RDT testovima u svrhu dijagnostike provode zdravstvene ustanove.

Zdravstvena ustanova koja obavlja antigenska testiranja (Ag-RDT) dužna je redovno izvještavati zavod za javno zdravstvo kantona, a zavod za javno zdravstvo kantona se obavezuje podatke o rezultatima antigenog testiranja (Ag-RDT) dostavljati Zavodu za javno zdravstvo Federacije BiH.

12. U cilju brže i efikasnije laboratorijske detekcije SARS-CoV-2 virusa nalaže se svim kantonalnim ministarstvima zdravstva da u saradnji sa zavodima zdravstvenog osiguranja kantona, kao i drugim zdravstvenim ustanovama, stave u funkciju sve resurse i kapacitete laboratorija verificiranih od strane Federalnog ministarstva zdravstva, kao i Veterinarskog fakulteta Univerziteta u Sarajevu – Laboratorij za molekularno-genetička i forenzička ispitivanja, kao podršku javnom sektoru zdravstva.

13. Nalaže se javnim zdravstvenim ustanovama koje posjeduju opremu za laboratorijsku izolaciju virusne RNA i identifikaciju uzročnika zarazne bolesti (SARS-CoV-2) radi utvrđivanja dijagnoze na COVID-19, da sve resurse i kapacitete stave na raspolaganje, u skladu s propisima, te ako nemaju verifikaciju od nadležnog ministarstva zdravstva pokrenu postupak za istu.

14. Nalaže se mikrobiološkim laboratorijima da redovno dostavljaju podatke Zavodu za javno zdravstvo Federacije BiH o testiranim osobama na SARS-CoV-2 i rezultatima testiranja, putem online platforme COVID-19.ba, koja u realnom vremenu prikazuje podatke o COVID-19 u Federaciji BiH, a svakim danom do 12:00 sati za prethodni dan.

U slučaju da ovlaštene zdravstvene ustanove (privatne i javne) ne dostavljaju podatke putem online platforme COVID-19.ba, a kako je definirano ovom naredbom, pokrenut će se postupak po službenoj dužnosti o stavljanju van snage rješenja donesenog od strane Federalnog ministarstva zdravstva za obavljanje mikrobiološke djelatnosti - laboratorijska izolacija virusne RNA i identifikacija uzročnika zarazne bolesti (SARS-CoV-2).

Nalaže se zdravstvenim ustanovama da redovno dostavljaju podatke o hospitaliziranim pacijentima, uključujući i hospitalizirane pacijente u jedinicama intenzivne njege, pacijentima na respiratoru, težini kliničke slike i ishodu liječenja (oporavljeni i umrli), te podatke o vakcinalnom statusu, kao i vrsti primljene vakcine za sve hospitalizirane pacijente nadležnim kantonalnim zavodima za javno zdravstvo, koji su dužni obavijestiti Zavod za javno zdravstvo Federacije BiH, putem online platforme COVID-19.ba, svakim danom do 12:00 sati za prethodni dan.

Agregirane sedmične podatke o hospitaliziranim pacijentima, pacijentima na respiratoru, i vakcinalnom statusu hospitaliziranih pacijenata, nadležni kantonalni zavodi za javno zdravstvo dostavljaju Zavodu za javno zdravstvo Federacije BiH, putem e-maila (i.covic@zzjzfbih.ba i m.smjecanin@zzjzfbih.ba) svakog ponedjeljka do 11:00 sati, na pripisanom obrascu.

15. Krizni štabovi kantonalnih ministarstava zdravstva imaju primjenjivati preporuke za otpuštanje osoba iz izolacije – COVID-19 sačinjene od Zavoda za javno zdravstvo Federacije BiH, koje su dostupne na stranici Zavoda: www.zzjzfbih.ba.
16. Naređuje se kriznim štabovima kantonalnih ministarstava zdravstva da najmanje jednom mjesečno dostavljaju izvještaj o svom radu Kriznom štabu Federalnog ministarstva zdravstva.
17. Naređuje se svim pedijatrijskim i drugim službama primarne zdravstvene zaštite zaduženim za provedbu imunizacije da izvrše reviziju zdravstvenih kartona i plana za imunizaciju sve djece koja podliježu programu obavezne imunizacije do završetka srednje škole u saradnji s kantonalnim zavodima za javno zdravstvo i intenziviraju imunizaciju djece koja su propustila jednu ili više vakcina iz programa obavezne imunizacije.

Odgovorna osoba za provedbu ove aktivnosti je direktor doma zdravlja te je isti dužan podnijeti izvještaj Zavodu za javno zdravstvo Federacije BiH i Federalnom ministarstvu zdravstva.

Zahtijeva se nadzor nad provedbom ove mjere od strane nadležne inspekcije.

18. Naređuje se svim centrima za mentalno zdravlje da stave u punu funkciju svoje kapacitete kao podršku mentalnom zdravlju stanovništva. Odgovorna osoba za provedbu ove aktivnosti je direktor doma zdravlja te je isti dužan podnijeti izvještaj Zavodu za javno zdravstvo Federacije BiH i Federalnom ministarstvu zdravstva.

Zahtijeva se nadzor nad provedbom ove mjere od strane nadležne inspekcije.

III. NAREDBE U VEZI ORGANIZIRANJA I PROVEDBE VAKCINACIJE PROTIV COVID-19

1. Naređuje se nadležnim tijelima vlasti u kantonima, kao i zdravstvenim ustanovama u kantonima kontinuirana provedba vakcinacije protiv COVID-19 u skladu s Pravilnikom o načinu provedbe obavezne imunizacije, imunoprofilakse i hemoprofilakse protiv zaraznih bolesti, te o osobama koje se podvrgavaju toj obavezi („Službene novine Federacije BiH“, br. 22/19, 12/21 i 47/21 i 69/21), kao i preporukama Stručnog savjetodavnog tijela za imunizaciju Federalnog ministarstva zdravstva.
2. Nadležna tijela vlasti u kantonima, kao i zdravstvene ustanove u kantonima, dužna su osigurati pomoć za komunikaciju s osobama koje imaju poteškoće sa sluhom i vidom, i to najmanje jedan dan u sedmici na mjestu provedbe vakcinacije, a u skladu s odredbama člana 12. Zakona o pravima, obavezama i odgovornostima pacijenata („Službene novine Federacije BiH“, broj 40/10).
3. Zavod za javno zdravstvo Federacije BiH će organizirati vakcinaciju grupa od posebnog značaja za Federaciju Bosne i Hercegovine i Bosnu i Hercegovinu.
4. U skladu s Pravilnikom o načinima provedbe obavezne imunizacije, imunoprofilakse i hemoprofilakse protiv zaraznih bolesti, te o osobama koje se podvrgavaju toj obavezi i dopunama navedenog pravilnika nalaže se zdravstvenim ustanovama da redovno unose podatke o vakcinaciji protiv COVID-19 i putem baze: vaccine.covid-19.ba.
5. Kanton koji nije formirao elektronsku bazu podataka o vakcinisanim osobama s područja kantona je istu dužan formirati hitno, a najduže u roku od 30 dana.

Organizacija vakcinacije protiv COVID-19 na nivou kantona

1. Nadležna tijela vlasti u kantonima, kao i zdravstvene ustanove u kantonima, dužna su otvoriti punktove za vakcinaciju protiv COVID-19 na nivou svake općine s ciljem veće dostupnosti vakcinacije protiv COVID-19 stanovništvu.
2. Nadležna tijela vlasti u kantonima, kao i zdravstvene ustanove u kantonima, dužna su organizirati vakcinaciju protiv COVID-19 tako da će se usluga vakcinacije pružati svakog radnog dana, najmanje tri puta sedmično do 20:00 sati, te minimalno jedan dan tokom vikenda.
3. Nadležna tijela vlasti u kantonima, kao i zdravstvene ustanove u kantonima, dužna su organizirati vakcinaciju protiv COVID-19 na mjestima većeg javnog okupljanja minimalno jednom sedmično. Zavodi za javno zdravstvo kantona dužni su o ovoj aktivnosti izvještavati krizne štabove kantonalnih ministarstava zdravstva i Krizni štab Federalnog ministarstva zdravstva jednom mjesečno.
4. Zavodi za javno zdravstvo kantona dužni su verificirati planove, obavljati monitoring i evaluaciju nad provedbom kantonalnih planova za vakcinaciju, te o istome mjesečno informirati krizne štabove kantonalnih ministarstava zdravstva i Krizni štab Federalnog ministarstva zdravstva.

IV. NAREDBE ZA POSLOVNE SUBJEKTE

1. Nalaže se svim pravnim i fizičkim osobama, koje zapošljavaju više od 20 radnika, da imaju krizni plan pripravnosti i odgovora na pojavu COVID-19, kojim će biti usklađena organizacija rada navedenih subjekata s datim preporukama i smjericama Zavoda za javno zdravstvo Federacije BiH i kantonalnih zavoda za javno zdravstvo, te da osiguraju njegovo redovno provođenje.
2. Nalaže se poslovnim subjektima da reorganiziraju rad svojih zaposlenika, na mjestima gdje nije moguće poštivati razmak od 2 metra među zaposlenima, tako što će reorganizirati radno vrijeme, organizirati rad u smjenama, omogućiti rad od kuće i primijeniti druge načine obavljanja radnih zadataka koji neće ugroziti djelatnosti i radne procese, a omogućit će poštivanje higijensko-epidemioloških mjera.

V. NAREDBE ZA PRODAVNICE

1. U svim oblicima prodavnica, u skladu s Pravilnikom o klasifikaciji prodavnica i drugih oblika trgovine na malo („Službene novine Federacije BiH“ broj 111/12) se ograničava broj kupaca prema sljedećim kriterijima, tako da se definira prostor od 10 m² prodajnog objekta po potrošaču.
2. Bez obzira na veličinu prostora prodajnog objekta, nije dopušten boravak više od 400 potrošača.
3. Prodavnica, kao i drugi objekti slične namjene, dužni su na ulazu u objekat na vidljivom mjestu postaviti informacije o veličini prodajnog prostora i maksimalno dopuštenom broju potrošača u skladu s definiranim prodajnim prostorom/broj potrošača.
4. Prodavnice, tržnice kao i drugi objekti slične namjene, dužni su osigurati rad svih kasa/naplatnih mjesta.
5. Prodavnice, tržni centri, tržnice, kao i drugi objekti slične namjene, dužni su osigurati COVID-redare.

VI. NAREDBE ZA UGOSTITELJSKE OBJEKTE

1. Dopušta se pružanje usluga u ugostiteljskim objektima u otvorenom i zatvorenom prostoru, samo sjedeća mjesta, u skladu s Poglavljem I. „Opće naredbe“, tač. 2. – 7., uz obavezno pridržavanje preporuka donesenih od zavoda za javno zdravstvo u Federaciji BiH (higijensko-epidemioloških mjera).
2. Ukoliko ugostiteljski objekat pruža usluge u skladu s tačkom 5. dužan je istaknuti to na vidnom mjestu ulaza u objekat.

VII. NAREDBE ZA USTANOVE KOJE ZBRINJAVAJU I SMJEŠTAJU STARIJE OSOBE, USTANOVE KOJE ZBRINJAVAJU I SMJEŠTAJU OSOBE S POTEŠKOĆAMA U RAZVOJU I OSOBE S DUŠEVNIM SMETNJAMA, KAZNENO-POPRAVNE USTANOVE I DRUGE USTANOVE SOCIJALNE ZAŠTITE

1. Dopuštaju se posjeti i izlaz osobama smještenim u ustanovama socijalne zaštite koje zbrinjavaju i smještaju starije osobe, uz uvjet da ustanova mora imati interni plan za posjete u ustanovi, kao i krizni plan u slučaju pojave zarazne bolesti COVID-19.

Ostale ustanove socijalne zaštite, uključujući u ovo i ustanove socijalne zaštite koje zbrinjavaju i smještaju osobe s poteškoćama u razvoju i osobe s duševnim smetnjama, te kazneno-popravne ustanove, moraju imati interni plan za posjete i izlaske iz ustanove, kao i krizni plan u slučaju pojave zarazne bolesti COVID-19, te imaju obavezu postupanja po istom.

2. Dopušta se prijem novih korisnika u ustanovama socijalne zaštite, uz uvjet da je prethodno provedeno PCR testiranje na COVID-19. Navedeno se primjenjuje i kod premještanja korisnika iz zdravstvene ustanove u ustanovu socijalne zaštite. Obaveza je ustanove socijalne zaštite osigurati prostor za izolaciju korisnika.

VIII. NAREDBE ZA GRADSKI, PRIGRADSKI I MEĐUGRADSKI PREVOZ

1. Rad gradskog, prigradskog i međugradskog prevoza, odvija se uz obavezno pridržavanje preporuka donesenih od zavoda za javno zdravstvo u Federaciji BiH (higijensko-epidemioloških mjera).
2. Prevoznici u gradskom, prigradskom i međugradskom prevozu dužni su osigurati COVID-redare.

IX. NAREDBE ZA OBRAZOVNE USTANOVE

1. Nadležna ministarstva obrazovanja kantona u saradnji s kriznim štabovima kantonalnih ministarstava zdravstva i zavoda za javno zdravstvo kantona će spram epidemiološke situacije COVID-19 na području kantona donijeti odluku o modelu i početku pohađanja nastave u novoj školskoj 2021./2022. godini za osnovno i srednje obrazovanje.
2. U cilju sprječavanja širenja COVID-19, svaka obrazovna ustanova na području kantona mora imati krizni plan pripravnosti i odgovora na pojavu COVID-19 i imenovan operativni tim za praćenje implementacije kriznog plana.
3. Obvezuju se kantonalne uprave za inspekcijske poslove, kao i nadležni inspektori pri gradovima i općinama, da nalože svim obrazovnim ustanovama u kantonu, u čijim prostorima i tokom provođenja obrazovnog procesa može doći do prenosa zarazne bolesti COVID-19, kao i drugih zaraznih bolesti, da uspostave i provode redovne kontrole higijenskih i zdravstveno-tehničkih uvjeta u objektu i procesu rada, provođenje planova samokontrole sačinjenih u skladu s principima analize rizika i kritičnih kontrolnih tačaka, a prema preporukama nadležnog zavoda za javno zdravstvo kantona. Navedeno uključuje i kontinuiran pojačan inspekcijski nadzor od nadležnih inspekcija u obrazovnim ustanovama s ciljem sprječavanja prenosa COVID-19.
4. Održavanje pripravničkog i specijalističkog, odnosno subspecijalističkog staža zdravstvenih radnika u zdravstvenim ustanovama te drugim institucijama u kojima se staž obavlja, polaganje stručnih, specijalističkih i subspecijalističkih ispita zdravstvenih radnika, kao i obavljanje pripravničkog staža i polaganje stručnih ispita u drugim strukama, odvija se uz striktno pridržavanje preporuka donesenih od zavoda za javno zdravstvo u Federaciji BiH (higijensko-epidemioloških mjera).
5. Nastava na fakultetima u akademskoj 2021./2022. godini odvija se uz striktno i kontinuirano pridržavanje higijensko-epidemioloških mjera za prevenciju COVID-19.
6. Tač. 3. i 4. ovog poglavlja primjenjuje se i na fakultete prilikom održavanja nastave u akademskoj 2021./2022. godini.

X. NAREDBE ZA POZORIŠTA I KINA

1. Izuzetno od Poglavlja I. „Opće naredbe“, tačke 3. kojom je utvrđeno da je u zatvorenom prostoru dopušteno okupljanje ljudi, ali ne više od 30 osoba, pozorištima i kinima dopušta se organiziranje predstava i projekcija filmova za ne više od 100 osoba, uz poštivanje higijensko-epidemioloških preporuka te obavezni fizički razmak od najmanje 2 metra između osoba, kao i pod uvjetom da veličina prostora u kojem se održavaju predstave i projekcije filmova omogućava provedbu navedenih mjera.
2. Krizni štabovi kantonalnih ministarstava zdravstva na osnovu procjene COVID-19 epidemiološke situacije na području kantona mogu reducirati broj osoba od maksimalno dopuštenog broja osoba iz tačke 1. ovog poglavlja.

XI. NAREDBE ZA SPORTSKA TAKMIČENJA I TRENAŽNE PROCESSE

1. Dopušta se održavanje profesionalnih sportskih takmičenja na otvorenom uz prisustvo gledalaca i pridržavanje higijensko-epidemioloških mjera, te u zatvorenom prostoru uz prisustvo gledalaca (ne više od 10% popunjenosti ukupnih kapaciteta) i uz uvjete primjene pravila VPT (vakcinisan/a, prebolio/ljela, testiran/a) definirano u općem dijelu ove naredbe, tačka 5. i uz poštivanje higijensko-epidemioloških mjera.
2. Osobe na tribinama ne smiju imati navijačke rekvizite, te moraju nositi zaštitne maske. Prilikom ulaska i izlaska sa stadiona potrebno je osigurati organizirani ulazak, uz poštivanje higijensko-epidemioloških mjera kao što su nošenje zaštitnih maski i držanje razmaka, za što su zaduženi COVID-redari.
3. Prilikom ulaska na stadion potrebno je staviti u upotrebu sve ulaze kako bi se smanjio rizik većeg okupljanja.
4. Dopušta se održavanje trenažnih procesa sportista svih profesionalnih sportskih klubova, uz obavezno pridržavanje preporuka donesenih od zavoda za javno zdravstvo u Federaciji BiH (higijensko-epidemioloških mjera).
5. Sportski savezi i organizatori sportskih takmičenja i trenažnih procesa iz ove tačke odgovorni su za provođenje higijensko-epidemioloških mjera.

XII. NAREDBE ZA ODRŽAVANJE KONGRESA, KONFERENCIJA I DRUGIH EDUKATIVNIH SKUPOVA U FEDERACIJI BOSNE I HERCEGOVINE

1. Izuzetno od Poglavlja I. „Opće naredbe“, tačke 3. kojom je utvrđeno da je u zatvorenom prostoru dopušteno okupljanje ljudi, ali ne više od 30 osoba, dopušta se održavanje kongresa, konferencija i drugih edukativnih skupova i za veći broj ljudi, i to maksimalno do 100 osoba, uz obavezno pridržavanje preporuka koje donosi Zavod za javno zdravstvo Federacije BiH (higijensko-epidemioloških mjera), te uz uvjet da svi učesnici skupa imaju:
 - negativan antigenski test, ne stariji od 24 sata ili PCR test, ne stariji od 48 sati, ili
 - potvrdu o prebolovanom COVID-19, ne stariju od 4 mjeseca, ili
 - potvrdu o završenoj vakcinaciji (ne stariju od 6 mjeseci nakon druge doze vakcine, odnosno 9 mjeseci nakon treće doze vakcine).
2. Sva mjesta moraju biti numerirana i svi učesnici popisani po sjedećim mjestima. Tokom skupa svi učesnici moraju sjediti na istim numeriranim mjestima.
3. Tokom stanke učesnici se moraju pridržavati propisanih higijensko-epidemioloških mjera.
4. Sjedenje za vrijeme obroka mora biti fiksno, odnosno svaki dan skupa sjede iste osobe za stolom, uz fizički razmak.

XIII. NAREDBE ZA NADLEŽNA INSPEKCIJSKA TIJELA I NADLEŽNE UPRAVE POLICIJA

1. Zadužuju se Federalna uprava za inspekcijske poslove, kantonalne uprave za inspekcijske poslove, kao i inspekcije organizirane pri nadležnim ministarstvima u kantonu, odnosno nadležni općinski i gradski inspektori da pojačaju inspekcijski nadzor, a u cilju kontrole provođenja naređenih mjera i sprječavanja širenja COVID-19 na području svoje jurisdikcije.
2. Zadužuju se FMUP – Federalna uprava policije i MUP kantona – Uprava policije u skladu s tačkom IV. Odluke o proglašenju prestanka stanja nesreće uzrokovane pojavom koronavirusa (COVID-19) na području Federacije Bosne i Hercegovine („Službene novine Federacije BiH“, br. 34/20 i 5/21) da poduzimaju mjere iz svoje nadležnosti kao podrška inspekcijskim službama, a u cilju kontrole provođenja naređenih mjera i sprječavanja širenja COVID-19 na području svoje jurisdikcije.
3. Zadužuju se Federalna uprava za inspekcijske poslove, kantonalne uprave za inspekcijske poslove, kao i inspekcije organizirane pri nadležnim ministarstvima u kantonu, odnosno nadležni općinski i gradski inspektori da dostave Kriznom štabu Federalnog ministarstva zdravstva, odnosno kriznim štabovima kantonalnih ministarstava zdravstva, izvještaje o pojačanom inspekcijskom nadzoru, a u cilju kontrole provođenja naređenih mjera i sprječavanja širenja COVID-19 na području svoje jurisdikcije te da navedene izvještaje nastave dostavljati u kontinuitetu svakih 14 dana. Krizni štabovi kantonalnih ministarstava zdravstva navedene objedinjene izvještaje za područje kantona dostavljaju Kriznom štabu Federalnog ministarstva zdravstva.
4. Zadužuje se Federalna uprava za inspekcijske poslove da obavi nadzor nad testiranjem, čuvanjem originalnih uzoraka i ekstrakcija, vođenju evidencija o korištenim internim i pozitivnim kontrolama u smislu utvrđenih vrijednosti istih, vođenju drugih evidencija, medicinskih dokumentacija, kao i izvještavanju o dobijenim rezultatima, nad svim mikrobiološkim laboratorijima verificiranim od strane Federalnog ministarstva zdravstva za laboratorijsku izolaciju virusne RNA i identifikaciju uzročnika zarazne bolesti (SARS-CoV-2) radi utvrđivanja dijagnoze na COVID-19.

XIV. NAREDBE ZA ODRŽAVANJE SJEDNICA I RADNIH TIJELA PARLAMENTA FEDERACIJE BOSNE I HERCEGOVINE

1. Izuzetno od Poglavlja I. „Opće naredbe“, tačke 3. kojom je utvrđeno da je u zatvorenom prostoru dopušteno okupljanje ljudi, ali ne više od 30 osoba, dopušta se održavanje sjednica i radnih tijela Parlamenta Federacije Bosne i Hercegovine, uz poštivanje higijensko-epidemioloških preporuka Zavoda za javno zdravstvo Federacije Bosne i Hercegovine, koje su sastavni dio ove naredbe, kao i pod uvjetom da veličina prostora u kojem se održavaju sjednice i radna tijela Parlamenta Federacije Bosne i Hercegovine omogućava provedbu navedenih mjera.
2. Nalaže se kriznim štabovima kantonalnih ministarstava zdravstva da na osnovu procjene COVID-19 epidemiološke situacije i uz higijensko-epidemiološke preporuke zavoda za javno zdravstvo kantona, na području kantona, kao i općina, donesu naredbu za održavanje sjednica i radnih tijela zakonodavnih tijela kantona, kao i tijela odlučivanja u jedinicama lokalne samouprave (gradska, općinska vijeća i sl.).

XV. NAREDBE ZA ODRŽAVANJE PRETRESA U SUDOVIMA U FEDERACIJI BOSNE I HERCEGOVINE

1. Izuzetno od Poglavlja I. „Opće naredbe“, tačke 3. kojom je utvrđeno da je u zatvorenom prostoru dopušteno okupljanje ljudi, ali ne više od 30 osoba, dopušta se održavanje pretresa u Vrhovnom sudu Federacije Bosne i Hercegovine, uz poštivanje higijensko-epidemioloških preporuka Zavoda za javno zdravstvo Federacije Bosne i Hercegovine, koje su sastavni dio ove naredbe, kao i pod uvjetom da veličina prostora u kojem se održavaju pretresi omogućava provedbu navedenih mjera.
2. Nalaže se kriznim štabovima kantonalnih ministarstava zdravstva da na osnovu procjene COVID-19 epidemiološke situacije i uz higijensko-epidemiološke preporuke zavoda za javno zdravstvo kantona, na području kantona, kao i općina, donesu naredbe za održavanja pretresa u sudovima na području kantona, kao i općina.

Prilog 2.

PREPORUKE KRIZNOG ŠTABA FEDERALNOG MINISTARSTVA ZDRAVSTVA

1. Preporučuje se osobama starije životne dobi, posebno onima s hroničnim bolestima, da i dalje izbjegavaju bespotrebna kretanja i korištenje javnog prevoza te da redovno koriste zaštitnu opremu.
2. U slučaju pojave nekih od simptoma kao što su: povišena temperatura, kašalj, gubitak mirisa ili okusa, preporučuje se osobama sa simptomima, kao i članovima njihovog domaćinstva, da ostanu kući te se telefonski jave nadležnom ljekaru kako bi dobili dalje upute.
3. Preporučuje se svim državljanima Federacije BiH da ne putuju u zemlje u kojima je prisutna visoka transmisija COVID-19.
4. Preporučuje se svim državljanima Federacije BiH koji žive ili rade u zemljama u kojima je prisutna visoka transmisija COVID-19 da ne dolaze u Federaciju BiH, zbog povećanja rizika od unošenja COVID-19, a što bi dodatno moglo rezultirati daljim pogoršanjem COVID-19 epidemiološke situacije u Federaciji BiH.
5. Preporučuje se nadležnim tijelima vlasti u kantonima, kao i zdravstvenim ustanovama u kantonima, organiziranje imunizacije protiv COVID-19 po načelu „dan otvorenih vrata“ prema raspoloživim količinama vakcina protiv COVID-19.
6. Vlade kantona, odnosno krizni štabovi kantonalnih ministarstava zdravstva, prema procjeni epidemiološke situacije u kantonu, preporuke od tač. 1. do 5. mogu donijeti i u formi naredbe.

BOSNA I HERCEGOVINA
FEDERACIJA BOSNE I
HERCEGOVINE
FEDERALNO
MINISTARSTVO
ZDRAVSTVA

BOSNIA AND HERZEGOVINA
FEDERATION OF BOSNIA
AND HERZEGOVINA
FEDERAL MINISTRY OF
HEALTH

**INFORMACIJA
O EPIDEMIOLOŠKOJ SITUACIJI COVID-19 U FEDERACIJI BOSNE I
HERCEGOVINE NA DAN 10.01.2022. GODINE, S PRIJEDLOGOM
NAREDBI I PREPORUKA KRIZNOG ŠTABA
FEDERALNOG MINISTARSTVA ZDRAVSTVA**

Sarajevo, januar 2022. godine

Cilj Informacije je realizacija provedbe Odluke o dopustivosti i meritumu Ustavnog suda Bosne i Hercegovine u predmetu E.Š i dr. broj: AP-3683/20, te s tim u vezi ispunjavanje obaveza iz tačke III. stav (1) Odluke o proglašenju prestanka stanja prirodne nesreće uzrokovane pojavom koronavirusa (COVID-19) na području Federacije Bosne i Hercegovine („Službene novine Federacije BiH“, br. 34/20 i 5/21).

Uz informaciju se daje kompletan pregled epidemiološke situacije COVID-19 u Federaciji Bosne i Hercegovine, te prijedlozi naredbi i preporuka Kriznog štaba Federalnog ministarstva zdravstva.

Epidemiološki izvještaj o COVID-19 u Federaciji BiH – 10.01.2022.

UKUPAN BROJ TESTOVA

1078447

UKUPNO POTVRĐENIH

195777

UKUPNO IZLIJEČENIH

173950

UKUPNO UMRLIH


7599

UKUPNO AKTIVNIH

14228

Prema podacima dostavljenim Zavodu za javno zdravstvo FBiH u Federaciji BiH, zaključno s 10.01.2022. u 12h, registrirano je 195.777 laboratorijski potvrđenih slučajeva COVID-19 bolesti i 7.599 smrtnih slučajeva povezanih s COVID-19. Trenutno je evidentirano 14.228 aktivnih slučajeva COVID-19.

Grafikon 1. Distribucija laboratorijski potvrđenih slučajeva COVID-19, Federacija BiH (do 10.01.2022. u 12h)



Plava linija – dnevni broj novih slučajeva, crvena linija – sedmodnevni prosjek broja novih slučajeva.

Tabela 1. Broj i incidenca laboratorijski potvrđenih i smrtnih slučajeva COVID-19 prema kantonima, Federacija BiH, 10.01.2022.

KANTON	Ukupan broj potvrđenih slučajeva	Incidenca na 100.000	Slučaje vi u zadnjih 7 dana	7-dnevna incidenca na 100.000	7-dnevna pozitivnost testova (%)	Broj smrtnih slučajeva	Smrtnost na 100.000
Unsko-sanski kanton	7109	2653.86	238	88.85	14,7	644	240.41
Posavski kanton	3051	7379.19	167	403.91	90,1	134	324.09
Tuzlanski kanton	31933	7277.16	738	168.18	26,1	1610	366.9
Zeničko-dobojski kanton	14209	3965.76	412	114.99	23,3	1467	409.44
Bosansko-podrinjski kanton	2375	10307.71	70	303.81	42,7	107	464.39
Srednjobosanski kanton	9488	3797.04	645	258.12	26,8	724	289.74
Hercegovačko-neretvanski kanton	39998	18434.81	1481	682.58	34,6	728	335.53
Zapadnohercegovački kanton	13047	13971.19	857	917.71	44,2	334	357.66
Kanton Sarajevo	67929	16154.49	2338	556.01	25,9	1678	399.05
Kanton 10	6655	8318.33	255	318.73	45,2	181	226.24
Federacija BiH	195794	8939.97	7201	328.8	29,04	7607	347.34

Na nivou Federacije BiH, 7-dnevna incidenca iznosi 328,8 slučaja/100.000 stanovnika. U posljednjih sedam dana, višu incidencu od prosječne zabilježene u Federaciji BiH imaju Zapadnohercegovački kanton, Hercegovačko-neretvanski kanton, Kanton Sarajevo i Posavski kanton.


Sedmodnevna pozitivnost testova varira među kantonima. Visoka pozitivnost ukazuje na neadekvatan broj PCR testiranja. Rezultati antigenskih testiranja nisu uključeni u izvještaj.

Hospitalizirani

U Federaciji BiH, na bolničkom liječenju trenutno je 505 osoba zbog COVID-19 bolesti, od kojih je 40 (7,9%) na invazivnoj mehaničkoj ventilaciji. Prema dostavljenim podacima, od 401 hospitalizirane osobe s podatkom o vakcinalnom statusu, 318 (79,3%) je nevakcinisanih i nepotpuno vakcinisanih, a 83 (20,7%) potpuno vakcinisanih.

**Podaci o vakcinalnom statusu iz SKB Mostar nisu dostavljeni.*


Grafikon 2. Prikaz broja hospitaliziranih osoba od COVID-19 i vakcinalni status, Federacija BiH (do 10.01.2022.)



Smrtni slučajevi

Do 10.01.2022. u 12h Zavodu za javno zdravstvo FBiH prijavljeno je 7.599 smrtnih slučajeva povezanih s COVID-19. U prethodnoj sedmici zabilježena su 93 smrtna slučaja povezana s COVID-19.

Grafikon 3. Distribucija smrtnih slučajeva od COVID-19 po sedmici, Federacija BiH (do 10.01.2022. u 12h)



Sedmični indikatori

U 1. sedmici bilježi se porast svih indikatora, najviše 7-dnevne incidence i broja novih potvrđenih slučajeva COVID-19.

Tabela 2. Sedmični indikatori, Federacija BiH 10.01.2022.

Sedmični indikatori	1. sed.	52. sed.	Promjena
Broj novih potvrđenih slučajeva COVID-19	7201	3625	98,6
7-dnevna incidenca	328,8	165,5	98,7
Ukupan broj hospitaliziranih pacijenata od COVID-19 na kraju sedmice	505	451	11,9
Broj pacijenata COVID-19 na respiratoru	40	29	37,9
Broj smrtnih slučajeva zbog COVID-19	93	72	29,1

Tabela 3. Pregled 7-dnevne incidence laboratorijski potvrđenih slučajeva COVID-19 za prethodne četiri sedmice prema kantonima, Federacija BiH, 10.01.2022.

KANTON	7-dnevna incidenca, 50. sed.	7-dnevna incidenca, 51. sed.	7-dnevna incidenca, 52. sed.	7-dnevna incidenca, 1. sed.
Unsko-sanski kanton	54.5	36.96	38.45	88.85
Posavski kanton	145.12	104	253.95	403.91
Tuzlanski kanton	75.2	72.7	72.7	168.18
Zeničko-dobojski kanton	38.52	28.47	52.19	114.99
Bosansko-podrinjski kanton	99.82	225,68	312.49	303.81
Srednjobosanski kanton	54.83	58.83	109,25	258.12
Hercegovačko-neretvanski kanton	165.46	192.65	400.06	682.58
Zapadnohercegovački kanton	147.78	128.5	535.42	917.71
Kanton Sarajevo	198.34	213.08	245,66	556.01
Kanton 10	77.5	51,25	206.24	318.73
Federacija BiH	101.68	102.14	165.52	328.8

Najviše vrijednosti 7-dnevne incidence zabilježene su u Hercegovačko-neretvanskom kantonu, Zapadnohercegovačkom kantonu i Kantonu Sarajevo.

Tabela 4. Rezultati nadzora nad varijantnim sojevima SARS-CoV-2 virusa, Federacija BiH, 10.01.2022.

Sedmica	Broj sekvenci	Alfa	Beta	Gamma	Delta	Omikron
38.	66	7	-	-	59	-
39.	36	-	-	-	36	-
40.	120	-	-	-	120	-
41.	66	-	-	-	66	-
42.	55	-	-	-	55	-
43.	82	-	-	-	82	-
44.	90	-	-	-	90	-
45.	78	-	-	-	78	-
46.	51	-	-	-	51	-
47.	72	-	-	-	72	-
48.	105	-	-	-	105	-
49.	91	-	-	-	91	-
50.	79	-	-	-	79	-
51.	56	-	-	-	52	4

Prema podacima sekvencioniranja dostavljenim od strane Laboratorija za molekularno dijagnostička i forenzička ispitivanja Veterinarskog instituta, na području Federacije BiH cirkulira dominantno Delta varijanta SARS-CoV-2 virusa, a u 51. sedmici prvi put se sekvencioniranjem detektira Omicron varijanta.

Za sve informacije, preporuke i smjernice o COVID-19 posjetite zvaničnu stranicu Zavoda za javno zdravstvo Federacije BiH www.zzjzfbih.ba ili www.covid-19.ba za trenutnu epidemiološku situaciju.

Ovaj epidemiološki izvještaj sadrži informacije prikupljene putem uspostavljenog sistema nadzora nad COVID-19 u Federaciji Bosne i Hercegovine, na sedmičnoj osnovi. Informacije o dnevnoj epidemiološkoj situaciji dostupne su na online platformi: www.covid-19.ba.

Izvori: online platforma www.covid-19.ba, izvještaji kantonalnih zavoda za javno zdravstvo i zdravstvenih ustanova u Federaciji Bosne i Hercegovine.

Izvještaj pripremila Služba za epidemiologiju, ZZJZ FBiH.

Vakcinacija protiv COVID-19 u Federaciji Bosne i Hercegovine

Ukupan broj administriranih vakcina u Federaciji BiH po kantonima

Kanton	Ukupan broj vakcinisanih u Federaciji BiH po kantonima (period 08.03. - 09.01.2022. godine)								Ukupan broj vakcinisanih u Federaciji BiH po kantonima (1. sedmica - period 03.01. 2022. godine)						
	Ukupan broj stanovnika sa navršenih 18 godina do 85+	Ukupno administriranih doza vakcina protiv COVID-19	Vakcinisani prvom dozom	Vakcinisani drugom dozom	Vakcinisani trećom dozom	% vakcinisanih prvom dozom	% vakcinisanih drugom dozom	% vakcinisanih trećom dozom	Ukupno administriranih doza vakcina protiv COVID-19	Vakcinisani prvom dozom	Vakcinisani drugom dozom	Vakcinisani trećom dozom	% vak. prvom dozom	% vak. drugom dozom	% vak. trećom dozom
Unsko-sanski	219.955	80.173	41.461	36.134	2.578	18,85	16,43	1,17	0	0	0	0	0,00	0,00	0,00
Posavski	35.731	14.575	7.069	6.370	1.136	19,78	17,83	3,18	0	0	0	0	0,00	0,00	0,00
Tuzlanski	361.714	248.976	123.565	115.870	9.541	34,16	32,03	2,64	3.798	515	1.236	2.047	0,14	0,34	0,57
Zeničko-dobojski	290.693	177.264	88.510	83.288	5.466	30,45	28,65	1,88	2.091	364	628	1.099	0,13	0,22	0,38
Bosansko-podrinjski	18.939	17.443	8.779	8.102	561	46,35	42,78	2,96	210	36	56	117	0,19	0,30	0,62
Srednjo bosanski	204.956	110.400	54.293	52.286	3.821	26,49	25,51	1,86	1.050	150	406	494	0,07	0,20	0,24
Hercegovačko-neretvanski	180.160	92.396	47.162	41.409	3.825	26,18	22,98	2,12	1.331	136	314	881	0,08	0,17	0,49
Zapadno hercegovački	76.538	19.089	9.365	8.893	831	12,24	11,62	1,09	223	49	80	94	0,06	0,10	0,12
Sarajevski	343.451	310.835	150.150	142.848	17.837	43,72	41,59	5,19	7.629	658	856	6.115	0,19	0,25	1,78
Kanton 10	68.591	17.994	9.316	8.252	426	13,58	12,03	0,62	0	0	0	0	0,00	0,00	0,00
UKUPNO	1.800.728	1.089.145	539.670	503.452	46.022	29,97	27,96	2,56	16.332	1.908	3.576	10.847	0,11	0,20	0,60

**Podaci o ukupnom broju stanovnika u dobi od navršenih 18 do 85+ godina – izvor Federalni zavod za statistiku*

**Nisu dostavljeni podaci iz USK, PK, K10*

Ukupan broj administriranih doza u Federaciji BiH prema vrsti vakcina

Ukupan broj vakcinisanih u Federaciji BiH prema vrsti vakcine																
Vrsta vakcine	Ukupno administriranih doza vakcina protiv COVID-19	Vakcinisani prvom dozom	Vakcinisane osobe po kategoriji				Vakcinisani drugom dozom	Vakcinisane osobe po kategoriji				Vakcinisani trećom dozom	Vakcinisane osobe po kategoriji			
			Zdravstveni radnici	hronični bolesnici mlađi od 60 godina	Osobe sa 60 i više godina	Ostali		Zdravstveni radnici	Hronični bolesnici mlađi od 60 godina	Osobe sa 60 i više godina	Ostali		Zdravstveni radnici	Hronični bolesnici mlađi od 60 godina	Osobe sa 60 i više godina	Ostali
AstraZeneca	368.970	190.990	11.484	54.301	80.173	45.032	177.319	10.645	47.480	74.810	44.384	661	361	0	80	72
Pfizer	409.006	191.150	11.254	52.222	69.716	57.958	179.101	9.327	45.734	70.596	53.444	38.755	4.426	3.375	20.461	5.927
Sinovac	52.182	26.573	636	2.660	17.479	57.977	25.301	485	3.464	16.094	5.258	308	5	4.714	247	20
Moderna	17.835	7.702	38	2.192	1.478	3.994	6.867	36	1.544	1.542	3.745	3.265	630	105	1.282	649
Sputnik V	0	0	0	0	0	0	0	0	0	0	0	0	0	635	0	0
Sinofarm	241.152	123.255	785	35.793	59.517	27.160	114.864	563	35.013	54.451	24.837	3.033	53	128	2.047	466
Johnson&Johnson	0	0	0	0	0	0	0	0	0	0	0	0	0	339	0	0
UKUPNO	1.089.145	539.670	24.197	147.168	228.363	192.121	503.452	21.056	133.235	217.493	131.668	46.022	5.475	9.296	24.117	7.134

**Nisu dostavljeni podaci iz USK, PK, K10*

**Ukupan broj distribuiranih vakcina prema kantonima za period od 08.03.-
09.01.2022. godine**

Kanton	Ukupno distribuirano doza vakcina protiv COVID-19 (09.01.2022)	Ukupno administriranih doza vakcina protiv COVID-19 (09.01.2022)	Broj doza kojim raspoložu	Postotak od ukupne količine (%)
Unsko-sanski	95.858	80.173	15.685	16,36
Posavski	26.660	14.575	12.085	45,33
Tuzlanski	274.294	248.976	25.318	9,23
Zeničko-dobojski	240.208	177.264	62.944	26,20
Bosansko-podrinjski	20.374	17.443	2.931	14,39
Srednjobosanski	139.392	110.400	28.992	20,80
Hercegovačko-neretvanski	138.908	92.396	46.512	33,48
Zapadnohercegovački	24.038	19.089	4.949	20,59
Sarajevski	359.870	310.835	49.035	13,63
Kanton 10	27.692	17.994	9.698	35,02
UKUPNO	1.347.294	1.089.145	258.149	19,16

**Nisu dostavljeni podaci iz USK, PK, K10*

Količine vakcina zaprimljene od strane ZZJZFBiH (period 08.03. – 24.12.2021. godine)

Vrsta	FBiH – zaprimljeno doza	Napomena	Datum zapisnika MCP	Broj zapisnika
AstraZeneca	10.000	10.000 donacija od Republike Srbije Federaciji (uzeto 60 doza na analizu od strane ALMBiH)	02. i 12.03.2021	M-02-02-1-41/21
Pfizer	15.210	COVAX mehanizam (uzeto 6 bočica za analizu)	25.03.2021	M-02-02-1-63/21
AstraZeneca	17.100	Covax mehanizam	26.03.2021	M-02-02-1-63-2/21
Sinovac	17.980	Donacija Republike Turske za FBiH (uzeto 40 doza za analizu)	30.03.2021	M-02-02-1-67/21
	400	Donacija Republike Turske za FBiH za vakcinaciju turskih zaposlenika u ambasadi Turske		
AstraZeneca	10.000	Donacija Republike Srbije Kantonu Sarajevo	10.04.2021	M-02-02-1-78/21
Sinovac	10.000	Donacija Republike Turske za FBiH za vakcinaciju policije (40 uzeto za analizu)	26.04.2021	M-02-02-1-87/21
Sinofarm	30.360	Donacija Republike Kine za FBiH (raspodjela na teren kreće od 05.05.2021. godine)	29.4.2021.	M-02-02-1-95-1/21
Pfizer	5.850	EU4Health	10.05.2021	M-02-02-1-108/21
AstraZeneca	500	Donacija UN za potrebe vakcinacije UN zaposlenika i članova njihovih porodica (-40)	10.05.2021	M-02-02-1-109/21
Pfizer	5.850	Covax mehanizam	4.5.2021.	M-02-02-1-94/2021
Pfizer	35.100	Covax	11.05.2021	M-02-02-1-110/21
Pfizer	29.250	Covax	12.05.2021	M-02-02-1-113/21
Pfizer	7.020	EU4Health	17.05.2021	M-02-02-1-121/21
AstraZeneca	26.480	Covax mehanizam	17.05.2021	M-02-02-1-118/21
AstraZeneca	10.000	Donacija Republike Srbije FBiH	18.05.2021	M-02-02-1-122/21
Pfizer	8.190	EU4Health	24.05.2021	M-02-02-1-125/21
Pfizer	5.850	EU4Health	31.05.2021	M-02-02-1-131/21
AstraZeneca	9.067	Donacija Republike Hrvatske FBiH	04.06.2021	M-02-02-1-135-1/21
	15.000	Donacija Republike Hrvatske FBiH - Sveučilišnoj kliničkoj bolnici Mostar		
Pfizer	5.850	EU4Health	09.06.2021	M-02-02-1-140/21
Pfizer	5.850	EU4Health	16.06.2021	M-02-02-1-150-1/21
AstraZeneca	4.960	Donacija RS za Tuzlu	18.06.2021	M-02-02-1-151-1/21
Pfizer	8.190	EU4Health	23.06.2021	M-02-02-1-155-1/21
Pfizer	8.190	EU4Health	30.06.2021	M-02-02-1-171/21
Sinovac	30.427	Donacija Republike Malezije FBiH	25.06.2021	M-02-02-157/21
AstraZeneca	10.000	Donacija Republike Srbije Kantonu Sarajevo	05.07.2021	M-02-02-1-174/21
Pfizer	4.680	EU4Health	07.07.2021	M-02-02-1-180/21
Sinofarm	100.000	Donacija Republike Mađarske FBiH	07.07.2021	M-02-02-1-179/21
AstraZeneca	500	Donacija UN za potrebe vakcinacije UN zaposlenika i članova njihovih porodica (-40)	12.07.2021	M-02-02-1-185/21
AstraZeneca	37.200	Donacija republike Grčke	14.07.2021	M-02-02-1-188/21
Pfizer	5.850	EU4Health	14.07.21021	M-02-02-1-189/21
AstraZeneca	36.830	Donacija Grčke	14.07.21021	M-02-02-1-189-1/21
AstraZeneca	24.800	Donacija Azerbejdžan	21.07.2021	M-02-02-1-195/21
AstraZeneca	86.360	Donacija Hrvatska	21.07.2021	M-02-02-1-196/21
Pfizer	8.190	EU4Health (uzeto 6 doza za analizu)	21.07.2021	M-02-02-1-197/21
Pfizer	8.190	EU4Health	28.07.2021	M-02.02-1-201/21
AstraZeneca	29.610	Donacija Azerbejdžan	28.07.2021	M-02-02-1-202/21
AstraZeneca	25.170	Covax mehanizam	04.08.2021	M-02-02-1-207/21
Pfizer	8.190	EU4HEALTH	04.08.2021	M-02-02-1-208/21
Sinofarm	500.000	Direktna nabavka	10.08.2021	S-02-02-1-606-6/21
Pfizer	10.530	EU4Health		M-02-02-1-216-1/21
AstraZeneca	30.840	Donacija Republike Bugarske	11.08.2021	M-02-02-1-215-1/21
AstraZeneca	307.710	Donacija Republike Austrije (uzeto 30 doza za kontrolu serije po 10 doza od sve tri serije)	13.08.2021	M-02-02-1-220/21
Pfizer	10.530	EU4Health		M-02-02-1-223/21
Pfizer	12.870	EU4Health	25.08.2021	M-02-02-1-226/21
Pfizer	64.350	Covax mehanizam	26.08.2021	M-02-02-1-229/21

Pfizer	60.840	Donacija vlade Slovenije	20.10.2021	M-02-02-1-286/21
Moderna	43.180	Donacija Republike Hrvatske	25.10.2021	M-02-02-1-290/21
Pfizer	117.000	Donacija Republike Poljske	03.11.2021	Nije vraćen zapisnik iz MCP
Pfizer	76.050	Donacija Republike Francuske	24.12.2021.	M-02-02-1-360-1/21
UKUPNO	1.952.144			

Procjena rizika

U Federaciji BiH se u proteklom izvještajnom periodu bilježi vrlo visok nivo prenosa SARS-CoV-2 virusa u zajednici – 7-dnevna incidenca 329 slučajeva/100.000 stanovnika (04-10.01.2022.) i 165,5 slučajeva/100.000 stanovnika (28.12.2021-03.01.2022). Značajne razlike u podacima o 7-dnevnoj pozitivnosti testova ukazuju na različite kapacitete za testiranje u kantonima, i podcjenjene vrijednosti 7-dnevne incidence. U proteklih sedam dana, vrlo visok nivo prenosa bilježi se u šest kantona: Zapadnohercegovačkom, Hercegovačko-neretvanskom, Kantonu Sarajevo, Posavskom i Bosansko-podrinjskom kantonu. Zaključno s 10.01.2022. godine, 505 osoba je hospitalizirano zbog posljedica COVID-19, od kojih je 40 na invazivnoj mehaničkoj ventilaciji. U proteklih 14 dana prijavljeno je 165 smrtnih slučajeva povezanih s COVID-19.

Uzimajući u obzir dinamiku distribucije varijanti SARS-CoV-2 (detektirane varijante koje izazivaju zabrinutost), eksponencijalni rast broja potvrđenih slučajeva COVID-19, spor proces i nedovoljan obuhvat imunizacijom protiv COVID-19 (29,9% ciljane populacije primilo je prvu dozu vakcine, 27,8% drugu dozu vakcine i 2% treću dozu vakcine u Federaciji BiH, samo oni koji su vakcinisani u Federaciji BiH), kao i propuste u kontinuiranom i dosljednom pridržavanju mjera za prevenciju i kontrolu infekcije, procjenjujemo da je prijetnja zdravlju opće populacije jako visoka.

Pojava Omicron varijante izaziva ozbiljnu zabrinutost zbog preliminarnih izvještaja o značajno većoj brzini prenosa i potencijalnom imunološkom bijegu u usporedbi s varijantom Delta. Iako su slučajevi Omicrona koji su prvobitno prijavljeni u EU bili povezani s putovanjima, sada se bilježi sve veći broj slučajeva, što ukazuje da je prenos u zajednici već u toku u zemljama EU i da se u sljedeća dva mjeseca očekuje dalji brzi porast broja slučajeva Omicrona. Delta varijanta ostaje trenutno najraširenija, međutim, Omicron će vjerojatno postati dominantna varijanta u prva dva mjeseca 2022. Podaci su trenutno previše ograničeni da bi se procijenila ozbiljnost bolesti uzrokovane Omicronom u populaciji s dovoljnom sigurnošću. Međutim, čak i ako je ozbiljnost bolesti uzrokovana Omicron varijantom jednaka ili niža od težine bolesti uzrokovane Delta varijantom, povećana prenosivost i rezultirajući eksponencijalni rast slučajeva brzo će nadmašiti sve prednosti potencijalno smanjene ozbiljnosti bolesti. Stoga se smatra vrlo vjerovatnim da će Omicron uzrokovati dodatne hospitalizacije i smrtno slučajev, uz one koje su se već očekivale u prethodnim prognozama koje su uzimale u obzir samo Delta varijantu. Rani dokazi iz studija neutralizacije in vitro, koji još nisu recenzirani, pokazuju smanjenu sposobnost neutralizacije u serumu vakcinisanih i serumu rekonvalescentnih osoba protiv Omicron u poređenju s drugim varijantama SARS-CoV-2, iako i dalje ne postoje dovoljni podaci. Prema trenutno dostupnim dokazima, za teške ishode uzrokovane Deltom i potencijalno Omicronom, dopunske doze povećavaju zaštitu, a očekuje se da će efekat na populaciju biti veći

ako se dopunska doza daje većini odrasle populacije unutar kratkog vremenskog intervala. Trenutno dostupni podaci podupiru sigurnu i efikasnu primjenu doze već tri mjeseca od završetka primarnog vakcinisanja.

U desetom mjesecu počelo je vakcinisanje trećom dozom u Federaciji BiH, najprije dodatne doze za posebna klinička stanja, zatim dodatnom dozom prema ranije definiranim prioritetnim skupinama u 11. mjesecu. Prema novim preporukama Stručnog savjetodavnog tijela za imunizaciju period za treću dozu smanjen je na minimalno tri mjeseca (1,2% ciljane populacije primilo je treću dozu vakcine u Federaciji BiH).

Prioritet treba biti povećanje obuvata imunizacijom osoba koje nisu još vakcinisane, svih dobnih skupina, naročito ranjivih skupina, starijih osoba i zdravstvenih radnika. Da bi se povećao nivo zaštite potrebno je nastaviti i dodatnu vakcinaciju nakon završetka primarne serije. U starijih osoba (i onih s najvećim rizikom od teških ishoda), koji nisu vakcinisani, ali i čiji imunitet izazvan vakcinom slabi s vremenom i dok nisu primili treću dozu vakcine, postoji rizik od infekcije/proboja infekcije koja može dovesti do sve većeg opterećenja zdravstvenog sistema u prvim mjesecima 2022. godine. Potrebno je dodatno naglasiti važnost pridržavanja propisanih javnozdravstvenih i društvenih mjera, kao i pojačan nadzor i napore nad suzbijanjem infekcije i prekida lanaca prenosa.

II. – PRIJEDLOG PREPORUKA I NAREDBI

Uvažavajući epidemiološku situaciju COVID-19 u Federaciji BiH, s procjenom rizika, Krizni štab Federalnog ministarstva zdravstva je 11.01.2022. godine održao sjednicu na kojoj su usvojeni prijedlozi naredbi i preporuka u cilju zaštite stanovništva od COVID-19 i sprječavanja dalje transmisije ove zarazne bolesti.

Sastavni dio ove Informacije su predložene naredbe (**Prilog 1.**) i predložene preporuke (**Prilog 2.**)